

TUSI FAILOTU

SETEMA 2014

Aso Gafua 01 Setema

Tusi Faitau: Mataio 12:9-14

Fuaiupu filifilia f.10c “E taga o faka’lei masaki i te Sapati?”

FAI A GALUEGA KOLA E MANAKOGINA KE FAI

I loto i tulaga o te tala ne aumai ne Mataio, se tala tela ne oko mai a lagona o te fia oko lima ki te tagata tenei e igoa ki a Iesu, se tala tela ne oko mai a lagona o te fia lamalama ki se kogatai ke maua ei te tagata tenei ko Iesu ke tamate ona me ko seke tena folafolaga mo tuu masani ke oko loa ki te iloa o te kau falesaio i te tulafono. E se taumate ko taku fakamasei ne latou a Iesu me se tagata ‘Ofa Tulafono,’ kae setioa foki la o fakafesili ne latou a Iesu me “e taga nei te faka’lei o masaki i te Sapati”?

Te fesili ne mafua mai i te loto masei, kae manino te tali a Iesu me e lei faeloa te fai o galuega kola e manakogina ke fai. Ko tena uiga la ke fai a galuega lei i te Sapati kae se ko galuega masei io me ko mea kola e se tau o fai. Iesu ko tali tonu ki te fesili kae fakaasi foki ne ia te uiga tonu loa o te Tala ‘Lei, me i te Tala ‘Lei e se mo fakatigaina ei tatou i te tautali atu i te tulafono, kae mo fakaola ei tatou. Ko tona uiga kafai ne galuega lei e tau o fai kae e fakaola ei tou taina io me ko nisi tino, e tau loa o fai. Io me e fai penei, e taua atu te ola i te sapati, me i te ola e tuku mai ne te Atua ke atafaigina ne tatou.

Aso Lua 02 Setema

Tusi Faitau: Mataio 14:22-33

Fuaiupu filifilia f.30 I te iloaga ne Petelu i te matagi ko agi malos, tupu ake ei mo tona matakau, kamata e iloa o apulu ki lalo, kae kalaga atu penei “Te Alik, fakaola mai au.”

KILOTONU KAE SA MATEMATE

Se tala masani e faitau tatou ki ei, te tala o te faigamalaga a soko kae galo a Iesu, kae se tafa taeao tela ne lavea ei ne soko a Iesu e sasale i luga i te vai. Ne fakatagi atu ei a Petelu kafai ko koe loa ko te Alik, fai mai sau fakatonuga ke sasale atu au ki a koe i luga i te tai. Ne tali atu te Alik, “vau la.” Ne fanaifo a Petelu mai luga i te poti o sasale ki te Alik, kae ko te taimi loa ne lavea i ei a peau mo galu, kamata ei o goto ki lalo. Te muna ko fakamafa o te aso tenei, ko te akai a Petelu ki te Alik ke fakaola a ia i te taimi ko kamata o apulu ki lalo.

E tenei te ata o tatou i loto i te olaga tenei. A aso e se tumau, e se tumau te lei o latou i aso katoa. E mai aso, e mai foki a taimi faigata mo fakalavelave tela kafai ko galo a Iesu ia tatou mea loa ko pulu kae goto tatou ki lalo i faigata mo fakalavelave o te olaga, kae ui ei ko seai e iloa se tino, io me ko koe mo au e se iloa ne ia a Iesu. Te fekau o te taeao nei e fakamasaua mai ke kilo tonu taua ki ei i mata o te fakatuanaki mo te talitonu katoatoa ki a Iesu i taimi katoa o te olaga, ka se mafai ei taua o pulu io me goto i loto i te olaga.

Aso Tolu 03 Setema

Tusi Faitau: Mataio 14:34-36

Fuaiupu filifilia f.35b Tela, fekau atu ei latou ki tino masaki i so se koga o te fenua tena, ke aumai ki a Iesu.

TE USIUSITAI KO TE MEA SILI TENA

Te tala tenei ko te tala o te fakaleiga o masaki o tino ne Iesu i te fenua ko Kenesaleta. I nisi fakamunaga te tala o te fakagataga o te mae mai foitino logomae ona ko masaki. Iesu mo tena galuega fakaola ne kami mai ne ia te tafolaga o tino masaki i te fenua ko Kenesaleta ke oko ki so

se koga o te fenua tena. Ko tona uiga la masaki valevale kola e pokotia i ei a tino i te fenua ka fakaleigina ona ko Iesu. Ko tona uiga la, me nofo a kita i fea, ka fakaleigina tena masaki mafai fua e usiuitai a ia kae tuu ona vae o fano ki te fekau o te fakaleiga tela ko aumai ne Iesu. Tuvalu, a koe mo au e fakaolagina seiloga ke ola koe o tautali ki fakatonuga o te tala lei. Tuvalu a te tala lei ko tausagaa a tena okomaiga ki te atufenua kae ko oti ne maua ne tatou a te fekau taua mai ei.

Ke masaua ne taua me ka fakaola fua a kita manafai e ola a ia ise olaga usiuitai. A taua e fakaola fua manafai te fekau a Iesu tela ne uga ki tino masaki i Kenesaleta ne uga mai foki ki a koe mo au i Tuvalu kae ne lagona ne koe, kae e se gata fua la i te lagona kae ke usiuitai foki a kita i ala o te loto maulalo.

Aso Faa 04 Setema

Tusi Faitau: Mataio 15:21-28

Fuaiupu filifilia f.26 & f.27 Ne tali atu a Iesu, “E se‘tau o tuku atu a meakai a tamaliki ki kuli.” Ne tali mai te fafine, “Te Alike e tonu e iloa koe, ka ko kuli e ‘kai foki ki matutuga o mea kola e tatela mai i te laulau a olotou pule.

KO IESU E MAUA EI NE TATOU TE MALOLOGA

Te ulutala ko fakamatalagina i ei a tulaga o‘tu saogalemu, kae tala mai foki i ei a lagona o te se fita. Te ulutala e iloa tonu i ei i te tagata tenei ko Iesu ko te mapuga o tatou, te ulutala foki e fakamatala i ei a te suiga fou o‘tu manava fita ki manava sako-lei manafai e kau Iesu mo tatou io me faka aofia faeloa Iesu i ‘tou olaga. Fai mai a tala i te vaitino ne ofo ona se tala fou ki te kilo o mata e tusa ei te mea ko tupu i te kilo atu a tino ‘gu‘gu ko faipati, a tino vae mutu ko lei, a tino pili ko sasale, mo tino kivi ko kite.

Ka kilo tatou ki te tala tenei e tai faigata foki loa mo te mea e iloa i aso nei, te seai ne mea fakafoofogina e tupu nei, kae ui ei e kese te malosia o Iesu mo ana tavini i aso nei. Iesu ko puke ki tena agatasi ne aumai ne tena tamana kae ko ‘tou mea e tau o fai e tasi pau faeloa, ko te olo atu o tatou ki a Iesu e ala i talosaga e maua ei ne tatou te malologa.

Aso Lima 05 Setema

Tusi Faitau: Mataio 15:32-39

Fuaiupu filifilia f.37 Ne ‘kai katoa, ko makona; ‘fao ake ei ne latou a tapola e fitu, ko ‘fonu i toega meakai.

VAU KI A IESU I TAIMI O TOU SE LAVA

Te tala tenei ko te tala o te fagaiga ne Iesu te fa afe o tino e se aofia ei tamaliki mo fafine. Ka kilo faka te mafaufau tatou ki te tala ne tusigina ne Mataio, e tai faigata foki loa te lava o se aofaki lasi o tino ma ‘kai ki mu falaoa e lima mo ika e luagamata. E se gata fua i te se lava kae e oko ki te takitaki malaga te mafaufau ‘mafa me ka fagai pefea ne ia ke makona a te kau-malaga i momea eloa konei ne maua, kae atea e seai ne meakai e tau o maua ise koga lavaki penei. Te atu-fenua i koga e nofo mai ei koutou, i kaiga, i minisituli, i fakapotopotoga, i vaega kesekese me ifea aka foki, ‘Vau ki a Iesu i taimi katoa mo tou se lava me ka fakalave ne ia.’

Mai i te molimau a Mataio, ne makona katoa a tino, ne lava kae toe foki te fa afe o tino i momea eloa ne maua, kae ne sapole vale fua a soko me ka maua mai fea meakai aua e seai se sitoa e pili ki te koga tenei ne manava ei te kau-malaga. Konei foki loa a lagona o tatou mafai ko se lava te fakasoa, mafai ko se lava te patietu. Iesu mo tena fakasoa e lava kae toe ei koe mo au mo tatou e seiloga fua ma vau koe ki a ia io me nofo koe ia ia.

Aso Ono 6 Setema

Tusi Faitau: Mataio

17:1-13

Fuiauupu filifilia 5: “Ka koi faipati a ia, fanake i te kaumana kena i luga o latou. Kae vau te leo mai i te kaumana penei, “ko taku Tama fagasele tenei, tela e fiafia au ki ei, ke fakalogo koutou ki a ia!”

TE FAKALOGO E IKU KI TE MANUIA

Tenei te molimau a Mataio e uiga mo te mea ne tupu ki a Iesu i luga i te mauga. Te mea ne tupu i luga i te mauga ko te fuliga a foliga o Iesu. E fakafoofogina te mea ne tupu, kae se akoakoga taua mo soko kola ne olo mo Iesu ki te mauga. I te molimau a soko fai mai ne lavea ne latou a Mose mo Elia e faipati mo Iesu. Te mea tela e taumafai ki ei te tusi tala o Mataio ko te taumafaiga o fakailoa ki tino faitau i ona vaitaimi a te tulaga fakalogo o latou ki te tulafono a Mose maise ei a pelofetaga kola ne pelofetagina ne pelofeta. I te fuiupu e 5 tela ko fai mo fuiupu filifilia e fai mai “ko taku tama fagasele tenei, tela e fiafia au ki ei, ke fakalogo koutou ki a ia!” E manino i konei me ia Iesu ko te taunuuga o te tulafono mo mea ne valoia ne pelofeta, ko ia ko te tino tela e tau o fakalogo tatou ki ei me maua i ei te manuia.

A te fakalogo e maua ne tatou te manuia, e maua ne tatou te filemu mo te tokaga malie. So se taimi loa ko se fakalogo ei tatou io me ko taumafai tatou o fakatuli tou taliga mai te musumusuga a te Agaga Tapu, tena tonu loa te taimi ka oko mai ki a tatou a fakalavelave o te olaga tenei. Iesu ne fakalogo, tena ne maua ei ne ia te manumalo i te sataulo.

Aso Sa, 07 Setema

Tusi Faitau: Mataio

25:1-30

Fuuaiupu filifilia, f23: “Ne fai atu a tona pule ki a ia, ‘Malo fakafetai, a koe se tavini ‘lei kae fakamaoni. “Ko oti koe ne fakamaoni i te tausiga o aofaki foliki, tela la, ka tuku atu ne au a koe ke pule i aofaki ‘lasi...”

KO TE TAUI LEI O TE FAKAMAONI

A te tala ki te tinogafulu tamafine mo tavini e tokotolu. E lua tala kae tasi te manakoga mo te kano loto o tala konei. Takato fakalava i tala konei te loto naunau o te Aliko ki ana soko i tena toe taimi mo latou. Ka oko mai te aso ka foki atu a Ia ki tena Tamana, kae ko latou ana soko ka fakasoko ne latou te galuega. Se galuega tela e manakogina te fakamaoni mo te tumau i te loto talitonu. Tenei te pogai ko ala o faipati penei te Aliko, ona me lavea ne Ia ana soko e seki toka, seki ai se pasene o te ola mafuta mo Ia. Te pasene tenei e manako ki ei te Aliko ke fakasoko ki ei te galuega talai. E se mafai o galue se tupe manafai e seai sena pasene faopoopo, ona me seai se faopoopoga ki ei.

Tenei te fatu o tala konei, ko te fakamaoni e tauigina. Ona me ka seai se fakamaoni e se mafai foki o lei kae toaga se tino o fai se galuega. Ka seai foki se fakamaoni, e seai foki se onosai o tautua i sose tulaga o te olaga. Kae maise la i ei se galuega tau kamata penei mo te vaitau tenei, tela e manakogina te ola tumau o ona soko i te fakamaoni. Me ka fakamaoni koe i mea foliki e pena foki koe o fakamaoni i mea lasi. E se manakogina la ke kilo mamagina ne taua ta ola tautua, ta ola kalagagina i sose tiute e fakatino ne taua, me i loto i ta kaiga, fenua, te Malo kae maise tena Ekalesia. E fakalagolago kae fakamoemoe sose taunuuga o se fakamoemoe ki ta fakamaoni o galuega kae tautua. Kae ka pena o maua ne taua te pasene faopoopo tela ko te tau

tonu tena o ta ola fakamaoni.

Aso Gafua 8 Setema

Tusi Faitau: Salamo 31:1-24

Fuaiupu filifilia f.1: "Te Alikī, au e fanatu ki a koe mo se puipuiga, sa fakatakavalegina au, koe ko te Atua amoitonu. Au e talo atu ke fakaola mai au."

OLA I SE OLAGA TALO

E tenei te auala e tasi e mafai ei ne tatou o tuku atu o'tou manakoga ki te Atua te tamana faka-te-lagi o tatou. Te talo se auala e fesokotaki ei taua mo ia tela ne faite ne ia koe mo au, ko te telefoni makini foki eloa kae sei se togi e maua mai i te fakaaogaga ne koe o se auala penei. E setaumate tasi foki loa o auala ne fakaaogina ne te kau Epelu i vaitau o Tavita. Kae ui ei te feitu tena, ne toe fakamasaua loa ne ia i te tusi ne ia fakatusi ko te mea ke faitau ki ei te tupulaga ke oko mai ki tou vaitau. Te mataupu tenei e tala katoa i ei te talo o te fakatuanaki, e sei ko tona uiga la te fakatuanaki ke nofonofu, ke moemoe kae maua mai i ei se lei mo te manuia, ikai, e manakogina te fakatuanaki ke ola ki faiga, fakaasi ki tua tou fakatuanaki e ala i tou talo tuku atu ki te Alikī. Te Salamo tenei ko fakamasaua me e taua te olaga talo kaea ko te tou auala e tasi tena e fesokotaki ei tatou mo tou Atua. Ea e fano koe mo au ki te Alikī i talosaga? Ea e olo tatou ki te Alikī e auala i talosaga i taimi e sousou ei te olaga? Ao, e taua te olo o tatou meko te Alikī fua e maua ei ne tatou a fakatokaga lei i tou olaga kae mao foki ei tatou mo fakalavelave.

Aso Lua, 09 Setema

Tusi Faitau: Salamo 101:1-8

Fuaiupu filifilia f.6a Au e fiafia ki tino kola e fakamaoni ki te Alikī, kae ka talia ne au latou ke nofo i toku fale.

TE TAUI LEI E MAUA MAI TE FAKAMAONI

I loto i te mataupu toetoe tenei a Salamo, e tala i ei a te tautoga a te tupu, se tautoga tela e maua mai i ei se taui lei manafai e fakamaoni a tino o te Alikī ki te Alikī. Te tautoga tenei e se loi kae e mafai o taunu seiloga la a tino o te Alikī ko fakamaoni ki te Alikī. E tenei foki loa te pogai ne lomigina i ei te mataupu tenei, e tela e fakatomua me ko te mataupu o te tautoga o fakamasaua ki tupulaga o Isalaelu me e taua kii te fakamaoni ki te Alikī. I nisi kiloga te tautoga tenei e maofa fua manafai a tino o te Alikī ko se fakamaoni ki te Alikī.

E tenei foki loa te manakoga o te tautoga ki a koe mo au i aso nei, ke ola taua o fakamaoni ki te Alikī. Te feagaiga tenei e taunu fua ki so se kelisiano tela e tausisi kae saele ne ia a kalafaga o te Alikī. Tuvalu te atu-fenua pele, a tou nofo mo toku i te fale o te Alikī, e tela ko te fale o te ola se gata mai e maua fua manafai a kita ne fakamaoni ki te Alikī i te aso nei. I nisi fakamunaga, ka fakamaoni koe ki te Alikī, a te Alikī foki e fakamaoni mai o aofia koe ki loto i te fale o te fakaolataga tumau.

Asotolu 10 Setema
11:1-7

Tusi Faitau: Salamo

Fuaiupu filifilia f.7 E amiotonu te Atua kae fiafia ki te amio lei. A latou kola e fakalogo ki a ia ka fai mo latou tena manuia.

FAKALOGO KI MUNA E TAU O FAI

I mafutaga i loto i kaiga e masani sale o kilogina i ei te vaega auala tenei io me ko te vaega faifaiga tenei i vasia o tamana ki olotou fanau, e pela foki matua ki olotou fanau. Ke manuia o se fanau mai i tena tamana mo tena matua i manuia o laua e maua ne se fanau manafai e ola i se olaga fakalogo, io me i matua o taua fanau e fai fua ne laua ou manakoga manafai ne ola koe mo au o fakalogo ki a laua. E penei foki loa te ata o te vasia o tatou fanau a te Atua ki luga i te Atua, e fakamanuiagina fua manafai e ola taua o fakalogo tonu ki te finagalo a te Atua. E se taumate e tenei foki loa te manakoga o te fai-salamo ki te fanauga o Isalaelu, kaea tena fakamasauaga i te olaga e tau o ola i ei a Isalaelu. Isalaelu muna a te, fai-salamo, "Te Atua e amiotonu kae fiafia ki te amio lei. A latou kola e fakalogo ki ia ka fai mo latou tena manuia." Ko tona uiga la, te fakalogo muna e tau o fai i aso katoa e ola ei tatou, te fakalogo muna e tau o fakamalosi taua o puke mau ki ei aua e mafua mai ei te olaga manuia mo te ataeao.

Aso Faa 11 Setema

Tusi Faitau: Luka 8: 4-15

Fuaiupu filifilia, f.8: "Kae ko nisi fuaga ne 'to ki te one lei, ne ola ake a lakau kae ne 'fua mai ki fuaga e takiselau. Ka ne toe fakaoti ake ne Iesu, "Faka'logo, mafai e isi ne otou taliga."

KO TOTOGA LAUKELE O TE LOTO TALITONU

Ko te tala fakatusa a Iesu ki te vaitino e uiga mo te tagata toki fuaga. Fai mai e tasi te vaega fuaga kae kesekese a laukele ne to i ei. E tokotasi te tagata toki fuaga kae kesekese a laukele ne to ki ei a fuaga, kae maise la i ei ko te kesekese o tulaga o te tupuakega io me ko te ola akaga o fuaga konei. Fai mai te tala, ko fuaga ne to atu ki te auala foliki mo laukele pa'papa ne seki ola lei, ko fuaga ne to atu ki va o mouku makaikai ne ola saitia. Ako fuaga kola ne to atu ki laukele ola lei ne tupu olaola kae fua mai.

Tenei te ata saukatoa o te olaga o sose Kelisiano, tenei ko fakatu mai ne Iesu kise ata faigofie kae malamalama gofie foki ki te vaitino. E fua te ola lei mo te fua mai o te Muna a te Atua ki a taua ana fanau mo ta fakatokaga io meko te taliaga ne taua a ia. Nisi e talia fakaafaafa, nisi e talia fua mo se taimi toetoe, kae ne nai e talia katoatoa kae toe fua mai. Ko latou la kola e talia katoatoa ne latou kae toe fua mai, e tenei vaega olaga tela e manakogina ne te Atua ke ola i ei taua. Seai se talia fakaafaafa ne taua a Ia, io me talia fua mose taimi toetoe ko toe foki ei taua ki tua, kae se ofo katoatoa atu ta ola mo ta mafai mo tena fekau mo tena galuega.

Aso Lima, 12 Setema

Tusi Faitau: Luka 16:1-13

Fuaiupu filifilia, f.9: "Kae ne fakasoko atu loa a Iesu o faipati: "Tela la, au e faiatu ki a koutou, fai ne outou taugasoa mo koutou eiloa..."

KO TE AOFAGA POTO

Te tavini faitogafiti tenei i te tala, ko fai mo ata fakatu o te olaga fai aofa- aofaga poto. Tena aofaga tena i te tulaga faigata ko oko ki a ia. Ko logotala tena pule i te fakalavelave ko oko ki ei tena tavini tela ne manatu aka te tavini me ko pili a ia o fakapalele ne tena pule. Mai kona ne fai ei tena aofaga gali kae poto, aofaga o katikati a kaitalafu a latou kola ne kaitalafu i tena pule. Se gata ka fai tenei mo mea e taku lei kae alofagina ei a ia ne tino konei manafai ko fakapalele a ia ne tena pule. Ia kae i te sua feitu, ka pena foki o fiafia a tino fai kaitalafu ki tena pule ona me ko katikati ki lalo olotou kaitalafu.

Tenei te olaga tela e tau o ola ei tatou Kelisiano, tatou e tau o ola aofaga mo te lei o tatou pena foki ki nisi o taina. Se fai pela tatou ko aofaga loa mo te lei o tatou kae ko se mafaufau tatou ki te lei o nisi o tou taina aka. Te olaga nei se olaga e galue kae amo fakatasi ne tatou, kafai ko tai vaivai kae solomuli tou taina, tatou e sala ne aofaga e toe fakalei kae fakamalosi aka i ei. Ke se kilo feitu tasi fua tatou mo tatou loa. Ona me i te Atua e se faapito alofa mo se tokotasi, a Ia e pau faeloa tona alofa ki a koe penei foki mo au.

Aso Ono, 13 Setema

Tusi Faitau: Luka 19:1-10

Fuaiupu filifilia, f.3 & f.4: "Ne fia lavea ne ia me ko oi a Iesu, i a ia se tagata toetoe fua kae se mafai ne ia o lavea a Iesu ona ko te vaitino. Ne tele ei a ia i mua o te vaitino, kae kake ake i te lakau ko te sukamolo ke lavea ne ia a Iesu, tela e vau i tena auala.

KAKE KE LAVEA TONU NE KOE A IESU

Sakaio se tagata e iloa tonu e iloa ne ia a tona tulaga toetoe i loto i te sosaiete ne ola aka i ei. Ona la ko tena fia kilo ki a Iesu ke matea ne ona mata, ne sala ei ne ia se auala ke mafai ne ia o fakataunu a tona fia kilo ki a Iesu.

I luga o te lakau ko te sukamolo ne fakakatoatoa ei tona fakamoemoega fia kilo ki mata o Iesu. Ka ko taunuga tonu foki e iloa mo te aso ko oti ne filifiligina ne te Aliko ke fai mo aso o te fakaolataga ki luga ia Sakaio mo tena kaiga. E tokouke o tatou e Manatu ifo me ko tatou e iloa ne fuli ne tatou a tatou e iloa ki te lei. Ikai! E se tonu a te tulaga fuli o tatou ko te Atua ne kalaga-gina ne ia tatou i loto i te olaga, ka ko tou tali ki tena kalaga ko te fakakatoatoaga tena o tena kalaga. Sakaio i tena loto e fia kilo ki a Iesu, ne fakagalue ei a ia ke gasue o sala se auala, me i te Aliko e manako ki a ia. kae e puli ia ia me ko te taimi o te Atua ke fakaola ei a ia mo tena kaiga.

A ta kalagagina ne te Atua i loto i te lalolagi, mo tena fekau mo tena galuega e ftoa mautinoa fua i tau tali mo taku tali, ki tena kalaga. A te Atua e kalaga i aso katoa o tou olaga mo tena fekau kae e fakatalitali aua ia koe mo au e nofo mo te katoatoaga o te kalaga a te Aliko tenei ki tou olaga.

Aso Sa, 14 Setema

Tusi Faitau: 1Kolinito 4:1-13

Fuaiupu filifilia, f.6e-f.7a: "Tausi ki fakatonuga 'tonu, E seai se tino ia koutou e tau o fakamatamata i te tino e tokotasi kae takalialia ki te sua tino...Kooi ne fai ne ia koutou ke maluga atu ki nisi tino?"

E FATAUA TATOU I TENA GALUEGA

Konei a muna akoako mo muna fautua a te apositolo ko Paulo ki ana taina faka-te-galuega. Ko fakamalosigina ne Paulo te fia taku lei mo te fia fai tulaga i loto i te fekau mo te galuega a te Atua. Fai mai Paulo, tatou ne tino galue fua kae seai ne pule, tatou foki ne tavini kae seai ne tupu ke fakamatamata tatou i loto i te galuega a te Atua. Konei a feitu e lavea ne te apositolo e vaivai i ei ana taina faka-te-galuega. E lasi ia latou te fia sili, te fia amiotonu kae fakatauemu. Ko mea konei kola ka fai mo tulaga e fakalavelavegina i ei te ola galuega tasi, kae maise la i ei ka mafai foki i ei o se fakamafa te ola tautua o latou i loto i te galuega.

Se fakamasauaga e taua kae aoga, ona mese mea e lavea ne tatou e 'tupu foki i aso nei. Tatou kola e tautua i tena fekau mo tena galuega, te galuega ia te Atua. Ko te Atua foki loa e pule aoao

i ei kae seai ko tatou. Tatou ko te galue fua kae tausi ana fakatonuga me i te fakamasinoga o tou galuega lei e vau loa fakamuli. Ka fakamasino te tino e tusa mo ana galuega lei ne fai mo te Atua kae seai ki a ia eiloa.

Aso Gafua 15 Setema

Tusi Faitau: Kolose 1:1-10

Fuaiupu filifilia, f.3 & f.4: "E fakafetai sale eiloa maua ki te Atua te Tamana o te tou Aliko ko Iesu Keliso, i taimi e talo ei maua mo koutou, i te mea kooti ne lagona ne maua a te tou fakatuanaki ki a Keliso Iesu, e pela foki mo te tou a'lofa ki kelisiano katoa.

KO TAVAEGA O TE FAKATUANAKI

Paulo ko fakaasi tena loto fakafetai mo tena loto tavae ki te kau talitonu i Kolose. Fai mai a muna o tena Talo Fakafetai, a maua e se gata eiloa te ma nofo talo atu mo koutou ona meko fua mai te mea tela ne fakamoemoe fakatasi a maua ki ei. Te kau talitonu i Kolose ko tupu kae olaola lei te olotou ola faka-te-agaga tela se kote mea ne finagalo ki ei a Paulo. Ko molimau ne Paulo te olotou taofi mau ki te tala lei, tela ko fua mai a fua o te galuega talai a te Atua.

Konei a talotaloga mo tavaega o te loto fakafetai mai te apositolo ki te kau talitonu i Kolose. Se mea tela e fakatupu ne ia te malosi fou mo te finafinau i te ola galue fakatasi o fakaola te tala lei a te Atua. E tenei foki loa te manakoga o te Ekalesia Kelisiano mo taua taina tuagane Kelisiano i te vai tau tenei. Ke se manatu mama taua ki te taku o taua ko ana fanau talitonu, ke maua ne taua a te ola fealofani, te ola fakatau fesoasoani kae galue fakatasi. Konei a nisi o vaega io me ko fuataga o te ola talitonu kae maise ko te taliagina ne taua Keliso ki ta olaga. E manakogina ke tumau tatou o fai, me ko galuega mo fuataga o te fakatuanaki.

Aso Lua 16 Setema

Tusi Faitau: Loma

5:1-5

Fuaiupu Filifilia, f.3 & f.4: "A tatou e fakamatamata i o'tou fakalavelave, me iloa ne tatou me i te fakalavelave e fakatupu ne ia te kufaki, a te kufaki e aumai ne ia a te taliaga a te Atua, kae ko tena taliaga e aumai ne ia te fakamoemoe."

KO FUATAGA O TE ONOSAIA

Paulo ko te tavini a te Atua tela ne kalagagina ke folafola ne ia a te Tala Lei ki tino katoa. I te taimi ne fai ei Paulo mo avefekau ki Ekalesia mo Kaulotu, ne fakamasaua atu ei ne ia ki te kau-fakatuanaki katoa ko te mea ke fua mai ne fuataga lei mai olotou olaga masani. E tenei foki eiloa a te kanoloto o te vaiaso tenei tela ka mafaufau loto tatou ki ei. I te taimi ne maua ei ne te kau fakatunaki a te malosi o te Agaga Tapu, ne fuli ei a olaga o latou, tela ne mafai ei o lavea atu a fuataga lei mai i olotou olaga masani. Ne mafua a mea konei ona ko te piki mau o te kau kelisiano ki te vine tonu tela ko Iesu Keliso. E tenei a te auala tela e aumai ei ne ia a te loto kufaki ko te mea ke malosi a te tulaga o te olaga fakatuanaki. A fuataga o te Agaga Tapu, ko te takitaki ala tena o mea lei katoa i te olaga o te Kelisiano. E tau la mo tatou o fakatino kae tauave i tou loto a fuataga gali konei o te Agaga Tapu, ona me ko te finagalo tapu tena o te Atua. ko te mea ke fai tatou mo tagata kola e fua mai ei a fuataga o te manumalo.

I te aso tenei a tatou e kamata i te onosai. E mafai la pefea ne tatou o faka fesagai mo tigaina, mafatiaga manafai e oko mai a masaki io me ko fakalavelave ki tou olaga? E mata e ita tatou io me fameo tatou ki vaega tulaga penei o te olaga? Te apositolo ko Paulo ne ofo atu katoatoa tena

ola mo te galuega a te Atua. Faitalia te uke o fakalavelave mo mafatiga ne oko ki ei a tena olaga. Kae ne seki fameo io mene muimui ki ei a te apositolo. Ne fiasia Paulo kae ne fakatumau a tena olaga tautua mo tena olaga fakamoemoe ki te Alikī. E se gata foki ei, ne malosī Paulo i tena olaga fakatunaki mo tena olaga onosai i loto i te galuega talai. Ne loto lasi kae loto malosī foki a Paulo ke oko eiloa ki te taimi tela ne fakamoemogina ne ia ke taunu mo te manuia a tena galuega i loto i te Tala Lei a Keliso Iesu.

Aso Tolu, 17 Setema

Tusi faitau: Efeso 4:31-5:2

Fuaiupu Fiilifilia, f.31&f.32: "Tiaki a uiga fakapiau, a uiga faka'mae loto, mo te kaitaua. Fakagata a te pakalaga valevale mo te pati masei! E tau mo koutou o fakatau-a'lofa kae fakatau-atafai; ke fakatau –fakamagalo foki a koutou, e pela eiloa te Atua ko oti ne fakamagalo ne ia koutou i a Keliso."

KO FUATAGA O TE FAKATAU ALOFA

A te fakatau alofa ko fuataga o te Agaga Tapu tela e fusi ne ia tatou ki te alofa. Mai tou olaga fakatau alofa, ko mafai ei ne tatou o lavea a te alofa fakatino o te Atua ki a tatou. Te alofa tela e seai sena gataaga ki te tagata. A te fakatau alofa ko te fakailoga sili tena o te sokotasi o tatou mo te Alikī. A te fakatau alofa foki e fakamasaua mai ki a tatua a te tulaga o te alofa atafai, fakamagalo, mo nisi uiga foki kola e fiasia ki ei te Atua. fakatau alofa foki e fakaasi tonu ei a te Atua mo tona alofa e tumau mo te tagata. A te fakatau alofa foki e fakasino mai ki a tatou a te tulaga o te sataulo o Iesu Keliso.

A te fakatau alofa foki e fakaasi tonu ei a te Atua mo tona alofa e tumau mo te tagata. A te fakatau alofa foki e fakasino mai ki a tatou a te tulaga o te sataulo o Iesu Keliso. E isi se kiloga maluga ki tulaga o mea tupu i te lalolagi tenei. Kola ko fai mo fakalavelave e puke tuu i ei tou olaga ne mea konei, ita, pati masei mo uiga fakamae loto mo nisi mea aka foki kola e se fiasia ki ei te Atua. A te fakatau fakamagalo mo te fakapuli o se mea 'se o tou tuakoi ne fai ki a koe ko oko loa i te faigata ki te olaga masani o te tagata. Kae ui ei ko toe fakamanatu mai ne Paulo i te taimi tenei, ko te mea ke galue tatou mo tou loto katoatoa ke isi ne fuataga o te alofa e mafai o lavea mai i tou uiga fakaasi. Kae maluga la i ei, ko te fakatau alofa o tatou e pela eiloa mo te mea tela e loto ki ei a te Atua ke fai ne tatou i tou olaga katoa.

-

Aso Faa, 18 Setema

Tusi Faitau: 2 Timoteo 2:20-26

Fuaiupu Filifilia, f.24 & 25: "Te tavini a te Atua e se tau mo ia o kinau, kae tau o alofa ki tino katoa, se fakailoga 'lei kae kufaki, tela e loto malalo ma fakatonu ne ia a ona fili me ka tuku i ei ne te Atua ki a latou a te avanoaga ke salamo, kae ke iloa foki i ei a te meatonu."

KO FUATAGA O TE AGAMĀLU

A te tagata agamalu e masani sale o fakamuna ne tino mese tagata e vaivai kae filemu. E tokouke tino i te lalolagi ko latou loa ko fiasia o pulepule ne latou a vaega tino penei ona ko olotou uiga fakaasi. Tela la se mea e lei kae gali ke kilokilo fakalei tatou ki uiga tonu o te tagata agamalu ona me fua mai ei ne futaga lei kae fakamalosī foki ei tou olaga tavini mo te Alikī.

I loto i te olaga o Iesu Keliso, a ia ne mafuta aka loa i tena olaga agamalu kae atafai. Ne fakaasi mai i tona alofa ki a tatou e auala i te fakaolataga ne fakatoka ne ia mo te tagata agasala. Ne fakaola kae fakamagalo foki ne ia a te fafine tela e taku pela mese fafine mulilua(i te Ioane

mataupu 8) Ne akoako atu ne ia ki te fafine ke se toe fai ne ia a te agasala tena. Tela ne sui ei a te olaga o te matua tenei ki se olaga fou kae gali.

E pena foki a te suiga ne ia a te olaga o te fafine i te vaikeli o Iakopo (Ioane 4). Mai tulaga mo kiloga konei, ne pena foki o sui ne Paulo a te olaga o Timoteo ko te mea ke ola kae tupu a ia i uiga lei. Ko te mea ke fakatino ne ia a te agamalu mo te lotu malalo. Ne akoako ne ia ke moa e olagina ne ia a te olaga fakamatamata kae fakasauā tino kola e alofa mai ki a ia. Fai mai a muna a te apositolo i te 2 Kolinito 10:1 “E faipati atu au ki a koutou i te lotu malalo mo te alofa o Keliso”. Tena te mea e tau ei mo tatou o fakaakoako kae fakatino i tou olaga a akoakoga gali a te Aliko ko Iesu Keliso i tena agamalu mo tena lotu malalo. Ka mafai ei ne tatou o lavea tonu a fuataga o te agamalu i lotu i tou olaga faka-kelisiano.

Aso Lima 19 Setema

Tusi Faitau: 1 Kolinito 5:6-11

Fuaiupu filifilia, f.8: ”Ke fakamanatu a te ‘tou Paseka, kae e se ki falaoa kola e isi i ei a te isi mua o te agasala mo te amio masei, kae ki falaoa se-ki palu ki te isi, ko te falaoa o te lotu ‘ma mo te meatonu.”

TAUSIGA O ASO FAKAMANATU

A tala o mea ne tupu i te Ekalesia i Kolinito i vaitaimi o Paulo, e pau loa mo tala o fakalavelave i aso nei, ka ko auala ne fakaaoga ne Paulo e tai ‘kese mo auala e fakaaoga ne tatou. E ui e iloa i kesekesega konei kae e isi loa ne mafaufauga a Paulo e aogaa kae tautonu mo te fakatelega o te Ekalesia i aso nei.

A Paulo ne akoako mai ne ia te meatonu euiga mo ‘kaiga i aso fakamanatu. Ne akoako mai ne Paulo a te uiga o te fakatusaga o te isi mo te falaoa seki palu ki te isi. Te falaoa ne palu ki te isi e fakatusa ki te olaga agasala, kae ko te falaoa seki palu ki te isi ko fakatusa ki tino fou kola ko oti ne fakafougina a olotou olaga i lotu i a Keliso. E manakogina ko tino talitonu ke taumafai o fakafou a olotou olaga i a Keliso. Ke moa e ‘siga latou ki tua ki te olaga agasala mo uiga se ‘lei, kae ke ola latou i a Keliso.

te taimi ne fepaki ei a soko o Iesu mo fakalavelave e uke, ne mafaufau latou ki ne auala ke agai atu ei a fakalavelave konei. E uke a fakalavelave e fakamafua ei a te olo keatea o tino mai te meatonu, kae ko te fekau o te Tala ‘Lei e fakaasi mai a te meatonu, mo te saolotoga tonu. Te tausiga o aso fakamanatu mo kaiga faka-tapuakiga e manakogina a te falaoa e ‘kese tela ko te falaoa o te fakamaoni mo te meatonu. Ne fakamasaua mai foki ki a tatou me ko Iesu ko ia ko te falaoa mo te uaina o te ola. E tau o fakamasaua ne tatou i taimi e kau- fakatasi ei ne tatou i te kaiga a te Aliko.

Aso Ono 20 Setema

Tusi Faitau: Kolose 2:16 -3:4

Fuaiupu filifilia, f17: ”A mea katoa pena se ata fua o mea mai i mua nei; a te meatonu ko Keliso.”

KILOGA KI MUA MO TE ‘LEI

A Paulo ko faipati ki te mea ko masani ei a ia i te galuega a te Aliko! Ne akoako ne Paulo me i te sasale o te tino i auala o te Atua, ka mafai ei o sokotaki mo Iesu. Ne fakamasaua foki ne Paulo me ko latou kola e ma’nako o sasale i auala o Iesu, e tau ke fakaasi a uiga lei i olotou olaga me

tena te mea e ‘tau o fai ne te tino ke maua ne ia te manuia. Mo tatou Kelisiano, a te fakafouga o ‘tou olaga e se ko tena uiga ke fakaseai ne tatou a te taua o tou foitino e pela mo tino ola, kae manakogi na ke olo keatea tatou mai auala masei, kae ke puke mau tatou ki te meatonu mo te alofa.

E tau o fakafesili ne tatou me nea auala ko oti ne olagina ne tatou kola e fakaasi i ei me ia tatou ne ola kae tausiusi ki te olaga fakatapu mo te Alike. Ko fakamasaua mai ki a tatou me e tasi eilola te auala, ko Iesu Keliso tela ko oti ne fakafougina ei tatou mo te lei i tou olaga. Ko ia ko te meatonu tela ne tuku mai ne te Atua ke fai mo ata fakaako ki tou olaga. Tela la, e tau ke olagina ne tatou i tou olaga katoa.

Aso Sa 21 Setema

Tusi Faitau: Maleko 8: 1 – 10

Fuaiupu filifilia, f.6: “Ne fakatonu atu ne ia tino ke nofo ki lalo, tela puke atu ei a ia ki falaoa e fitu, ko fakafetai ki te Atua, ko tofitofi ne Ia kae tuku atu ki ona soko ke tufatufa atu ki te vaitino. Kae ne fai eilola ne te kausoko.”

KAUFATASI I TE OLAGA FOAKI

E lua vavega ne fai ne Iesu: Ko te fagaiga o te 5000 o tino Iutaia, mo te fagaiga o te 4000 o tino o fenua fakaatea kola ne omai mai kogakoga tai mao eilola. A vavega konei ne fai i taimi kesekese ona ko te alofa ne fai ei ne Ia a kaiga konei e fakaasi atu i ei ki tino, me i te Atua e alofa ki tino katoa, kae se fua ko tino o te gafa o Apelamo. Ko te alofa foki o te Atua, ne mafai i ei ne Iesu o fakataunu a manakoga o tino konei i te feitu faka-te-foitino pena foki faka-te-agaga. E tiga eilola te pau mo te kesekesega o kaiga konei e lua, e se mafai eilola o fakapuli a tulaga konei ne fai ei ne Ia a kaiga konei e fakaasi atu i ei ki tino, i te Atua e alofa ki tino katoa, kae se fua ko tino o te gafa o Apelamo pena foki ki tino katoa. Ko te alofa foki o te Atua, ne mafai i ei ne Iesu o fakataunu a manakoga o tino konei i te feitu faka-te-foitino pena foki faka-te-agaga. E tiga eilola te pau mo te kesekesega o kaiga konei e lua, e se mafai eilola o fakapuli a ‘kaiga konei me ne kaiga kola ne fakaasi ei ne Iesu a tena mana. A te alofa o te Atua tenei e tumau kae mautakitaki ki tino katoa. A te alofa o te Atua e se fakailoga tino, e tumau o foaki mai ne ia a meakai mo mainu ki tino katoa.

Aso Gafua 22 Setema

Tusi faitau: Loma 15:1-7; 13-16

Fuaiupu Filifilia, f.2 & f.3a: “Kae, e tau mo tatou o fakafiafia a o’ou taina mo te lotou lei eilola, ko te mea ke atiake a latou i te fakatuanaki. Me ia Keliso seki fakafiafia a ia eilola.

Me ia Keliso seki fakafiafia a ia eilola.

KO FUATAGA O TE AGALEI

Te Atua se Atua e agalei kae alofa ki a tatou. Se Atua foki e fai meatonu kae fai mea lei ki te olaga o te tagata. Mai uiga fakaasi o te Atua mo te tagata, ko mafai foki ei ne tatou o fakatino a te agalei o te Atua i tou olaga katoa. Ko te meaalofa sili tena a te Atua ki tou olaga e auala i tena Agaga Tapu. Ko te mea ke maluga ia tatou a fuataga o te agalei i loto i tou uiga fakaasi. A te auala e olo ei tatou ki te Atua, ona ko te fakalagolago o tatou ki tena agalei, ko te mea ke mafai o aumai ne ia a mea lei katoa ki a tatou.

E pena foki a te fakamoemoega ola o te Atua, tela e tau mo taua o fakamalosi i te vasia o te sua

tino ki te sua tino. Ko te mea ke maua ne tatou a te olaga fai mea lei i aso katoa o te olaga. Sose mea lei tela e fai ne tatou i tou olaga. Ko fakaasiga mana kona o te Agaga Tapu o te Atua mo tatou. Me i fuataga o te agalei. Ko mea lei katoa kola e tupu mai loto i tou loto, ko galuega mo fuataga kona o te Agaga Tapu ki tou olaga. Mai i te agalei tenei ka mafai ei ne tatou o fakaoko atu ki sose tino tela e manakogina ne ia a te fesoasoani i te olaga tenei. Me tena foki e iloa a te loto o te Atua ko te mea ke olagina ne tatou i loto i tou olaga faka-Kelisiano.

Aso Lua 23 Setema

Tusai Faitau: 2 Timoteo 1:1-14

Fuaiupu Filifilia, f.13: "Taofi ke mau ki muna 'tonu kola ne akoako atu neau ki a koe e pela mo se fakoakoakoga mo koe o tautali i ei, kae tumau i te fakatuanaki mo te alofa tela ea tatou i te 'kau fakatasi mo Keliso Iesu."

KO FUATAGA O TE FAKATUANAKI

I te fenua ko Amelika e masani o lavea sale a tugamau o misionale o te lotu Metotisi kola ne galue mo te avega o te tala lei. Mai te ata o tugamau konei o misionale, ne fai mo mea e malosi ei a loto fakatuanaki o tagata Kelisiano ona te feagai o latou mo fakalavelave kola e mafai ei o afaina a olotou ola. E tokouke misionale ne faimalaga atu foki i vaitaimi tonu e iloa o te fakasauaga mo te fakapologaaga o tagata. Ne fetau latou mo tulafono fakasaua. Ne kini kae ne peipei foki latou ki fatu, ne feagai foki latou mo famai e uke. Ne faigata a te tulaga o te galue talai, ona ko nisi lotu ne pono ona ko oti ne faka ki lalo a olotou falesa.

Kae ui e iloa a tulaga faigata mo fakalavelave konei ne tupu kae tumau e iloa a te olotou fakatunaki kae galue malosi. E isi se misionale ne mate i Lonitona (London), ne mafua aka ei se fesili e fai penei- Kooi la ka uga atu ne tatou? Kooi se tino ka sui ne ia tatou? A te fesili tenei e seai se fesili fou, kae se fesili ko leva foki loa ne tauave sale i loto o tavini a te Atua i taimi o te galuega talai. Kae fai mai te tala, me i te misionale tenei ne mate, kae ko ia foki e iloa ne tali ne ia a te fesili tenei i ona vaitaimi. Tenei la tena tali ki ei- "Ko au tenei, uga mai au!" (Isaia 6:8).

Tenei a te ata o te tagata fakamaoni ki te Atua, mo te ata o te Atua tela e tausii fakamaoni ki ana tavini. A te fakatuanaki ko te fakaasiga tonu tena o te Atua, tela e fakamatala i ei ne tatou a uiga fakaasi o te Atua ki tagata. E fakamanatu mai foki ki a tatou, me i te Atua e fai feagaiga faeloa mo tatou i aso katoa o tou olaga.

Aso Tolu 24 Setema

Tusi Faitau: Maleko 3: 13-19

Fuaiupu filifilia vaega o te f.13 & f.14 "Ne fanake a Iesu ki te mauga kae kalaga atu a Ia ki tino kola e loto a Ia ki ei. Ne omai ki a Ia, filifili ei ne Ia te tinoagafulu mo te tokolua kae fakaigoa ne Ia ki apositolo, kae fai atu penei, 'ko oti ne filifili ne au koutou ke nofo tasi tatou, ka uga atu foki ne au koutou ke olo o folafola atu te Tala Lei."

KAUFAKATASI I LOTO I TE GALUEGA

Te kalagagina o apositolo ne Iesu e fakaasi mai i ei me e isi se pogai taua. Iesu ne manako ke nofo tasi a ia mo latou, ke akoako ne ia, kae ke ga'lua fakatasi mo ia mo te fakamomoega ke mafai ne latou o olo atu ki koga katoa o fakasoko a te galuega ko oti ne kamata ne Ia. Ne avatu ne Iesu te mana mo te malosi ke fai latou mo apositolo malosi i te fakalauefaga o te fekau mo te galuega, maise ko te Malo o te Atua. A te kalaga o Iesu tenei e tumau ki ana tavini i aso nei. Tatou ko ana tavini kola ka fakasoko a te galuega folafola o te Tala 'Lei.

Tela la, e taua ke fai tatou mo tino e fakalogo kae tautali ki a Iesu, ka ke fai foki tatou mo ana mea faigaluega malosi kola e fakamaoni i loto i tena fekau mo tena galuega. E manakogina a te kau fakatasi o tatou e pela me ne tavini ko oti ne kalagagina ke fakasoko a te talaiga o te Tala 'Lei o te fakaolataga. E seai se tino e 'vae keatea a ia mai te mafutaga tenei o te Aliko mo ana tavini, kae ke tumau o kaufakatasi kae galue fakatasi mo Ia ke oko ki te gataga o te lalolagi.

Aso Faa 25 Setema

Tusi Faitau: Maleko 8: 11 – 21

Fuaiupu filifilia, f.21: "Ne fesili atu a ia ki a latou," Kae e a e seki malamalama eiloa koutou?"

KAUFAKATASI I LOTO I FUIFAIGA

Ne omai nisi o falesaio o faka-kinau ki a Iesu mo te mafaufauga ke malei ne latou a Ia. Ne fakamolemole atu ei latou ki a Ia, ke fai aka se vavega o tofotofo a Ia. Ne seki talia ne Iesu, tela ne taumafai ei latou o puke faka-pagota a Iesu. E tenei foki eiloa te pogai ne fakatoka fakavave i ei te lotou poti o faimalaga atu ki nisi fakai o te kau Iutaia. I te taimi o te faigamalaga, a soko ne taumafai o fakamasausau ki mea ne tauloto ne latou, mea ne tupu ki a latou, kae maise ko mea ne seki malamalama kae numi foki i ei olotou mafaufau. Te taimi foki eiloa tenei, ne fakafesiligina i ei latou ne Iesu ki fesili e iva. Te fakalavelave me ne seki mafai ne latou o tali katoa a fesili ona me i a latou ne nofo tonu i te taega o toega a meakai. Kae ko fesili e fitu kola ne seki mafai ne latou o tali, ne fai mo mea e gasolo aka loa latou o numi kae se malamalama.

Ne fesili atu i ei Iesu, ea e seki malamalama eiloa koutou? Te fakalavelave me i te fakatuanaki o te kau soko ki a Iesu, ne seki katoatoa, kae ko oko loa i te vaivai. Sea te uiga tonu o te fakatuanaki tela ne seki malamalama i ei te kau soko mo te kau falesaio? Fai mai te tusi tala ki te kau Epelu, me i te fakatuanaki ko te talitonu ki mea e fakamoemoe tatou ki ei, ko te talitonu fakamaoni foki ki mea e se matea ki mata (Epelu 11.1).

Aso Lima 26 Setema

Tusi Faitau Maleko 10: 23 – 31

Fuaiupu filifilia, vaega o te f.25: "E sili atu a te faigata mo se tino maukoloa ke ulu atu ki te Malo o te Atua i lo mo se kamela o ulu atu i loto o te pu o se nila."

TIAKI A MEA SE AOGA

Tino maumea i nisi taimi e talitonu kae mafaufau pela me i olotou maumea ne maua mai i olotou poto mo olotou malosi totino. A te talitonu mo te mafaufauga tenei ko leva ne ola i taimi o Iesu, kae koi ola foki i aso nei. Kafai la e tenei foki te lagona ki te mafai ne tatou o ulu fale atu ki te Malo o te Atua, ko fakafesiligina i ei ne tatou a te tulaga tenei, me se mafaufauga e se tonu. Aua me se mafai ne se tino o ulu atu ki te Malo o te Atua i tena malosi, kae e mafai i te fakana o tatou ki te alofa tauanoa o te Atua tela ne auala mai I tena fagasele ko Iesu.

Masaua me ia Iesu e alofa mai faeloa manafai ko pokotia tou olaga ne fuifaiga o te olaga tenei. Tela la, ke tiaki a mea se aoga, ke talitonu kae fakatuanaki tatou ki a Iesu, ka faigofie i ei a mea katoa. Ke masaua foki ne tatou me e seai se mea e faigata i te Aliko, a mea kola e se oko ki ei a te malosi, te poto mo te mafai o te tagata, kae ki te Atua e faigofie a mea katoa.

Aso Ono 27 Setema

Tusi Faitau Maleko 10: 28 – 31

Fuaiupu filifilia, f.31: “E tokouke a tino ne ‘mua ka fakamuli, kae e tokouke a tino ne fakamuli ka ‘mua.’”

TIAKI MEA KATOA

Ne takotonu mai ne Petelu mo nisi soko, me ko tiaki ne latou a mea katoa kola e fai mo fakalavelave i te lotou tautali ki a Iesu. Ne tali atu a Iesu ki a latou, ‘e tonu kae fai atu au me i sose tino e tiaki ne ia tena fale, taina, tuagaene, te matua mo te tamana, fanau mo ana manafa ona ko Au mo te Tala Lei, ka uke atu ana mea e maua i te kautama tenei kae maise ko te ola segata mai.

E isi ne mafaufauga se tonu ka aumai ne tatou ki loto i te Malo o te Atua, kola ka mafai o fakasegina i ei te tou kiloga ki tino talitonu. Ne manatu aka pela me i apositolo, takitaki mo latou kola ne lasi olotou taulaga ofo atu, ne mate ona ko te lotou fakatuanaki, kae ka mua latou i aso fakamuli. Kae fai mai Iesu, me ese tonu te kiloga tenei. E isi nisi ne se tiaki olotou kaiga, kae ne fai eiloa ne latou a te loto o te Atua, e pela mo te fafine ko mate tena avaga kae ne tuku atu katoa ana mea e ola i ei a ia mo te Aliko.

I aso nei e lavea ne tatou a nisi tino ko ofo atu olotou ola ke tausi ne latou a tamaliki seai ne matua, mo latou kola ko pokotia ne te masaki pisi ko te selamete, ke oko ki tamaliki se katoatoa. E tenei te fakafoligaga o te ola tuku atu o tautua mo te Aliko. Mai i tulaga tautua konei, ka maua eiloa ne latou te tau.

E fakaasi mai i konei, me ese ko tino fua kola e tiaki ne latou olotou fale mo kaiga, kae fakamaina atili mai foki ne Iesu, me ko latou foki kola e fai ne latou te loto o te Aliko, e maua foki ne latou a te tau fakafiafia.

Aso Sa 28 Setema

Tusi Faitau: Maleko 8: 34-38

Fuaiupu filifilia, f.34: “Ne kalaga atu Iesu ki te vaitino mo ona soko ke omai ki a ia, kae fai atu, ‘sose tino e manako o tautali mai ia Au, e tau o se mafaufau ki a ia, kae amo tena sataulo,, tautali mai ei ia au.’”

KAUFAKATASI I MAEGA O TE GALUEGA

E isi ne kelisiano e masani o pei ne latou a te sataulo e pela mese malele aulo, mo se mafaufauga ke fai pela me se ata fakaasi o tena avanoaga ke amanaiaigina a ia ne tino i koga kesekese. E se tenei la te mea e fakauiga ki ei a Iesu ki te ‘amo tou sataulo’. Te ‘amo tou sataulo’ i aso takitasi, se faifaiga e tapu kae se fakasiga foki e fakatino i ei te talia katoatoa o Iesu ke fai mo pule o te olaga.

Ne fano Iesu i tena auala ki Ielusalema o fakafeagai mo mea katoa kola ka tupu i ei. Ne manako Iesu o fai ne ia ne fakatokaga mo ona soko mo aso mai mua. E pena foki ki tino tokouke kola e tautali ki a Ia i koga katoa, fakatasi mo tino kola ka tautali ki a Ia i kautama gasolo. Ne fakamaoni Iesu o fakatoka a latou kola e fia fai mo soko, tela ne tumau te fakamasaua ne Ia ki a latou me i te tautali ki a Ia, e tau mo latou o alofa ki te Atua pela foki ki tuakoi. Te Aliko Iesu e manako ko tatou ke tuku atu tou ola mo te faiga o tena galuega. Tela la, ke toka foki tatou o talia a faigataga mo maega o tena galuega, pela eiloa mo te tou Aliko, ne talia katoatoa ne Ia

ko Ia ke puapuaga, kae mae ko te mea ke maua ne tatou a te ola.

Aso Gafua 29 Setema

Tusi Faitau Maleko 10: 35-45

Fuaiupu filifilifilia, f.38e: "Ea e mafai ne koulua o inu ki te ipu ka inu au i ei? E mafai ke papatisogina koulua i te papatisoga ka papatiso ei au?"

KE PELA MO IESU

A soko pili ki a Iesu, Iakopo mo Ioane, ne lasi te se maina, kae e manako malosi loa ke tavaegina kae ke fakatulagagina foki laua, e se i te olaga nei, kae pena foki i te ola e segata mai. E seki maina loa i taumafaiga a Iesu o fakaasi kae akoako mai te tulaga o te olaga e tau o olagina, ke oko foki ki tena manumalo tela e maua i te tuki o ia ki fao kae velo ki te tao. Te kaufakatasi i te ipu mo te papatisoga, ko te ata o te fakatau fesoasoani o fakataua a Iesu, mo te fakamoemoega maluga ke maua se fuliga ki tino, kae e lavea loa me e se talia ne latou. A latou e mafaufau fua ke maua ne latou a fiafiaga, tela i te lagonaga ne latou a te manakooga a Iakopo mo Ioane, ne taumafai malosi Iesu ke fakatonu te faitu tenei.

A Iesu e tumau faeloa te kami ne ia tatou, e se gata i ei, kae e fakamalosi foki ne ia tatou ke pela mo Ia, o faka-akoako ki a Ia, me e tasi faeloa tenei te auala e maua i ei ne tatou te saolotoga mo te fiafiaga tonu. E lava te onosai ia Iesu o kufaki ne ia tou vaivaiga, tela e se mafai loa o tiakina ne Ia tatou. E mautakitaki a tena alofa faka-tamana, kae ka fai tatou mo tino fou ia Keliso Iesu.

Aso Lua 30 Setema

Tusi faitau: 1 Samuelu 16:1-13

Fuaiupu filifilia vaega o te f7: "E se pau taku filifiliga mo te filifiliga o te tagata, a te tagata e kilo ki te gali o te faitu ki tua, ka ko Au e kilo ki te loto o te tino."

TE ATUA E LOTO ATU TENA KILOGA KI TE KILOGA A TE TAGATA

I nisi taimi tatou e fakasegina ne tou filifiliga e fai. Kafai ko fili 'se tou taugasoa tatou e masani o kilo ki foliga ki tua o te tino. Kafai ko fili 'se tou tino ke tu i te fale Palamene, a tatou e masani o fakalogo fua ki ana pati mo ona fakamoemoega mo te manuia mo aso mai mua. A te mea taua e tau o iloa ne tatou i filiga penei ko uiga o te tino e tau ke iloa fakalei ne tatou, e iloa lei ne tatou me se vaega tino pefea te tino tena.

E tenei te mea ne tupu i te taimi ne fili i ei ne Samuelu te tupu mai tamaliki a Iese. I te kilo a Samuelu me tau ko Eliapo, kae ne faiatu te Alike ki a Samuelu sa saga ki tena loa mo tena gali, se ko ia tena. A te tagata e kilo ki te gali o te faitu ki tua, ka ko te Atua e kilo ki te loto o te tino. Ne fakatonu atu ei te Alike ki a Samuelu ke faau a Tavita ke fai mo tupu, ke fai a ia mo sui o Saulo.

E fakaasi mai konei me i te Atua e loto atu tena kiloga ki te kiloga a te tagata. A tino kola e fili ne ia ko tino kola e i si i ei te fakalogo mo te fai meatonu.